

PAN-EVROPSKI UNIVERZITET
"APEIRON" BANJA LUKA

Broj: /

Datum: godine



VRAĆANJE PAMETI

Ne biste vjerovali koliko je teško napisati smislen tekst o ovdašnjoj stvarnosti. Znam to jer se svakih 15 dana trudim uraditi upravo to, ali vremenom koje neumitno prolazi, a ništa progresivnog ne donosi, to postaje sve teže. Gluposti na sve strane, iz svih oblasti, sa svakog nivoa, morao bi biti neki genije da sve pohvataš. E, onda počnem razmišljati generalno i sve se svede na pitanje u kakvoj to općoj atmosferi živimo, pa samim tim i sudjelujemo i kada smo tačno pristali na to da je sve u ovom društvu pogrešno, a da smo, eto, mi oni pravi... I nešto se sve nadam da odgovor neću dugo čekati, jer je jedna ovdašnja televizija, vrlo promućurno, odlučila (ovo se ja samo nadam) izbaciti kuhare iz svog programa, a na velika vrata uvesti psihijatre koji će nam, je li, umjesto punjenih paprika i inih specijaliteta, pružiti besplatan tretman u cilju poboljšanja mentalnog zdravlja nacije. Kakav sjajan urednički pogodak... Zaista. Nisam ironična, niti bilo šta slično. Vjerovatno nikada neću saznati ko je i kada shvatio da ovom narodu (bez obzira na naciju, vjeru i bla bla bla...) treba kolektivni psihološki tretman, ali moram primijetiti da se radi o odličnoj ideji, a nadam se i realizaciji (barem sudeći po najavljenim stručnjacima).

Zašto se, dakle, radujem toj emisiji? Pa uglavnom zbog toga što se nadam da će, kada već to PREDVODNICI naroda nisu znali, htjeli, umjeli... tim istim narodima psihijatri vratiti davno izgubljeni sistem moralnih, etičkih vrijednosti, a koje bi onda u nekoj budućnosti zamijenile sadašnja mjerila koja uspjeh svode na broj stambenih kvadrata (koje su, je li, naslijedili od deda i nana, koji su opet onako redom bili iz uglednih bogatih porodica – nevjerovatno je koliko je ova Bosna, a bogami i Hercegovina zapravo bogata zemlja), na broj konja u motorima limuzina parkiranih ispred tih istih stambenih kvadrata; na *cool* boju najnovijeg *smartphone* uređaja i tako dalje i tome slično. Rada, truda i znanja kao kategorija koje čovjeka čovjekom čine, nema više ni u fus notama ovdašnje društvene zbilje, pa se sve nekako nadam da će upravo stručna lica uspjeti vratiti pamet ovim narodima da shvate koliko je poniženje dopustiti vlastitom životu ovisnost od nekih i uglavnom priučenih političara, od likova koji svoj posao u nekoj od ovih "funkcionalnih" institucija mogu zahvaliti svemu osim onome što se u normalnom i zdravom društvenom ambijentu podrazumijeva – znanju, dakle, i sposobnostima – pa da će neka generacija (možda čak upravo ova koja se i za matične brojeve morala "tući" sa ovdašnjom "inteligencijom") jednom na zelenu granu....

Do tada, svi pred male ekrane... Ali ne zbog *Farme*, nego... Znae već, pametnom je i išaret dosta... **B**

Aida Delić,
glavna i odgovorna urednica